

Museo Arqueologico Aruba ta recorda Mai Odor

ORANJESTAD (AAN): Den e luna aki, den cual Aruba ta celebra su cultura y simbolonan patrio, Museo Arqueologico Aruba (AMA) kier recorda sr. Mario Odor kende recientemente a fayece.

Mai, manera tur hende na

museo tabata yam'e, semper a comparti e dedicacion y stimacion pa Aruba su herencia cultural cu AMA. Pa inauguracion di museo Mai a aporta na e exposicion di Museo Arqueologico y awendia tin piezanan di "coleccion Mai Odor" den Museo Arqueologico.

Na 1990 tempo cu museo a inventariza tur e lugarnan arqueologico riba nos isla, a haya un colaboracion masha valioso di Mai. Hunto cu personal di museo el a bishita un cantidad di lugar y a yuda cu informacion tocante material prehistorico y historico di e lugarnan aki. Ta den parti danki na su persona cu museo a logra documenta 109 lugar arqueologico e tempo ey. Peseu tambe a gradici'e amplia-



mente den e publicacion number 5 di museo titulo "Reconstructing Brasilwood Island: the Archaeology and Landscape of Indian Aruba" cual buki a presenta e resultadonan di e investigacion di 1990.

Na 1995 a haya colaboracion atrobe di Mai ora a cuminsa cu e proyecto "The Shell Industry of Aruba". Mai a duna tur su colaboracion pa documenta su coleccion di material di cocolishi lo cual sigur tabata un aporte importante na e proyecto aki. Tabata apenas un par di siman pasa cu a bay cerca Mai na su cas na Timbalstraat den cuadro di e proyecto aki. Manera semper su persona y Sra. Ines a ricibi personal di museo cu tur amabilidad y a

suministra cierto obhetonan pa fotografia y documentacion.

Mai Odor a ser guia semper pa un gran amor pa cultura y historia di su pais. E informacion cu el a logra compila durante añanan semper tabata disponibel pa Museo Arqueologico. Ultimo añanan Museo Arqueologico a bin ta traha mas estrechamente cu Mai su Museo Numismatico y sigur lo sinti su falta den proyectonan di futuro. Pa Museo Arqueologico, Mai tabata un ehempel di con importante ta pa traha hunto ora di studia, cuida y promove nos herencia cultural. Ohala cu e espirito ey guia e desaroyo di nos sector cultural en particular y nos pais en general.